

Headlines

1. पूरे देश आला लेखा जम्मू च बी रेई रक्खड़ी दी धूम, गुड्डियां बदाइये लोकें मनाया त्यौहार।
2. अज्ज रक्खड़ पुन्नेया दे मौके सलाना श्री अमरनाथ जात्तरा सम्पन्न होई, इस साल 4.8 लक्ख श्रद्धालुएं बाबा बर्फानी दी गुफा च मत्था टेकेआ।
3. जम्मू-कश्मीर 2035 धोडी 11 ज्हार मेगावाट पनबिजली दी क्षमता हासल करग।
4. जम्मू-श्रीनगर बश्कार त्री वंदे भारत रेल गड्डी तौले गै शुरू होग, आखेआ केंद्री मंत्री जितेंद्र सिंह होरें।
5. पी.एम ई-सेवा हेठ जम्मू गी 25 होर इलेक्ट्रिक बसां थोडन।

<><><><><>

Raksha Bandhan

भैनै-भ्राएं दे अनव्रुट हिरख-प्यार दा धेयार “रक्खड़ी” अज्ज पूरे देश च चायें-चायें मनाया जा’रदा ऐ। अज्जे दे ध्याड़े भैनां अपने भ्राएं दी बिनी पर रंग-बिरंगी रक्खड़ी बन्धियां न ते उन्दी खुशहाली ते नरोई सेहत लेई दुआ करदियां न। बदले च भ्रां अपनी बहनें दी राक्खी ते तांऽ उमर उन्दा साथ निभाने दा वचन दिंदे न ते उनें’गी तोहफे बी दिंदे न। जम्मू च बी अज्ज “रक्खड़ी” दा धेयार बड़े मते उत्साह कन्नै मनाया जा’रदा ऐ। बजारें च मिठाइयें दियां हट्टियां ते होर दुइयां दकानां सजी दियां न ते लोकें दी रौनक दिक्खने गी लभा’रदी ऐ। लोक ते चेचा करी न्याने बडुलै थमां गै गुड्डियां चढा’रदे न। राश्ट्रपति द्रौपदी मुर्मू होरें लोकें गी “रक्खड़ी” दे धेयार दी बधाई दिती ते गलाया जे एह धेयार सदीयें थमां गै देश दी संस्कृति ते परम्परा दा अनव्रुट हिस्सा रेआ ऐ। राश्ट्रपति द्रौपदी मुर्मू, उपराश्ट्रपति सी.पी राधाकृष्णन ते प्रधानमंत्री नरेंद्र मोदी होरें नमीं दिल्ली च बक्ख-बक्ख स्कूलें ते संस्थाएं दे बच्चें कन्नै रक्खड़ी दा त्यौहार मनाया। सोशल मीडिया पोस्ट पर अपने संदेश च राश्ट्रपति द्रौपदी मुर्मू होरें आखेआ जे रक्खड़ी दा महत्व शड़ा भ्राऽ-भैन दे रिश्ते तगर सीमित नेई ऐ सगुआं एह पविततर धागा परोआर दे सदस्यें, दोस्ते ते इत्थें तगर जे बूहटे गी बी बन्नेआ जाई सकदा ऐ। प्रधानमंत्री नरेंद्र मोदी होरें रक्खड़ी दियां शुभकामनां दिदे होई मेज जताई जे एह त्यौहार आपसी प्यार ते भाईचारे दे रिश्ते गी होर मजबूत करग ते सारें दी जिंदगी च खुशहाली लेई औग। जम्मू-कश्मीर दे उपराज्यपाल मनोज सिन्हा ते मुख्मन्त्री उमर अब्दुल्ला होरें बी रक्खड़ी दी सारें गी बधाई ते शुभकानां दितियां न।

<><><><><>

BSF Army Rakhi

रक्खड़ी दे मौके पर जम्मू संभाग च भारत-पाकिस्तान अंतरराश्ट्री बन्ने ते नियंत्रण रेखा उपपर तैनात सैकड़ें बीएसएफ, सेना ते सी.आर.पी.एफ दे जवानें गी स्कूली बच्चें ते महिलाएं उनेंगी दक्खड़ियां बन्नियां। जम्मू, साम्बा, कठुआ, राजौरी ते पुंछ जिले दे बक्ख-बक्ख बन्ने आहले इलाकें च एह समारोह आयोजित कीते गे। इस मौके पर महिलाएं ते विद्यार्थीएं देसै दी राक्खी करने आहले सुरक्षाबलें दे जवानें दा आभार प्रगट कीता। आर.एस.पुरा सेक्टर च छात्राएं बीएसएफ दे जवानें कन्नै मलाटी कीती। छात्राएं जवानें गी टिक्का लाइयै रक्खड़ी बन्नी। उनें जवानें दी लम्मी बरेसू ते सुरक्षा लेई प्रार्थना कीती। जम्मू दे बाल निकेतन वेद मंदर च बी रक्खड़ी दा त्यौहार बड़े उत्साह ते खुशी कन्नै मनाया गेआ। बच्चें रक्खड़ी बन्नियां ते इस त्यौहार बारै अपने बचार सांझे कीतेबाईट.....

<><><><><>

Shri Amarnath Yatra

जम्मू-कश्मीर च 57 दिनें तगर चलने आहली सालाना श्री अमरनाथ यात्रा अज्ज रक्खड़ी दे मौके पर सम्पन्न होआ रदी ऐ। इस बरे एह यात्रा 3 जुलाई गी शुरू होई ही। यात्रा दे समापन महंत दीपेन्द्र गिरि हुं’दी अगुआई च पवित्र छड़ी मुबारक गी श्री अमरनाथ दी पवित्र गुफा च पुज्जने कन्नै होआ। इस बरे 4 लक्ख 80 ज्हार शा मते श्रद्धालुएं पहलगाम ते बालटाल दौने रस्तेआ बाबा श्री अमरनाथ दे दर्शन कीते। यात्रा दौरान तीर्थयात्री भगवान शिव हुं’दा शिरवाद मंगने ते कुदरती तौरा पर बने द बर्फू दे

शिवलिंग दे दर्शन लेई तकरीबन 3 ज्हार 888 मीटर दी ऊंचाई पर स्थित पवित्र अमरनाथ गुफा च जंदे ना। तोंआई सालाना बाबा बुड्ढा अमरनाथ यात्रा बी अज्ज सम्पन्न होआ'रदी ऐ। सौन महीन च आयोजित एह यत्रा 12 दिन चलदी ऐ। इस दौरान श्रद्धालु जम्मू-कश्मीर दे पुंछ जिले च स्थित बाबा बुड्ढा अमरनाथ मंदरै च पूजा-अर्चना करदे ना। एह मंदर पुंछ जिले दे मंडी तैहसील दे राजपुरा गां च स्थित ऐ।

<><><><><><>

CS-Hydropower Project

जम्मू-कश्मीर च बिजली क्षेत्र च इक बड्डै बदलाव दी तैयारी होआ करदी ऐ। सरकार नै इक व्यापक समेबद्द योजना तैयार कीती ऐ जेह्दे तैहत दिसंबर 2035 तगर जम्मू-कश्मीर दी चालू जल विद्युत उत्पादन क्षमता गी 10 ज्हार 969.65 मेगावाट तगर पुज्जने दा लक्ष्य रक्खेआ गेआ ऐ। एह मौजूदा 3 ज्हार 5400 अशारिया 15 मेगावाट दी स्थापित क्षमता थमां त्रै गुणा शा बी मती ऐ। उर्जा सुरक्षा गी मजबूत करने, बाहरी स्रोतें थमां बिजली उप्पर निर्भरता घटाने ते लम्में समें दी आर्थिक तरक्की दी नीह मजबूत करने दे मकसद कनै बनाई गेदी इस योजना दी अज्ज मुख् सचिव अटल डुल्लू हुं'दी अध्यक्षता च होई दी इक उच्च स्तरीय बैठक च विस्तार कन्नै समीक्षा कीती गेई।

<><><><><><>

India-Nepal

नेपाल-तिब्बत बन्ने पर आए दे चानचक्क हाड कन्नै मरने आहलें दी गिनतरी बधियै 469 होई गेई ऐ। जिल्लै के बन्ने दे दौनें पाससे 1 ज्हार 545 लोक अजें बी लापता ना। बचाऽ दल दरेआएं दे कंडे ते बक्ख-बक्ख बस्तियें च लोकें दी तपाश दा कम्म करा'रदे ना। इसै बश्कार भारत सरकार नै नेपाल च आई दी इस तबाही दे मगरा इक बड्डा राहत ते बचाऽ अभियान शुरू करी दित्ता ऐ। विदेश मंत्रालय मताबक नेपाल च 290 भारती नागरिकें कन्नै अजें तगर कोई संपर्क नेई होई सकेआ ऐ ते एह्दे लेई लगातार कोशिशं चला करदियां ना। अजें तगर भारत नै 84 भारती नागरिकें गी सुरक्षित बचाई लैता ऐ जेह्दे च 63 मजदूर त्रिशूली-1 जल विद्युत परियोजना थमां ते 21 लोक तमिलनाडू दे शामिल ना। विदेश मंत्री एस जयशंकर होरें आखेआ ऐ जे मंत्रालय नै नेपाल सरकार, होर मंत्रालयें, राज्य सरकारें, टूरर आपरेटरें ते सरबन्धत एजेंसिएं कन्नै लगातार तालमेल बनाई रक्खे दा ऐ। इस बचाऽ अभियान गी तेज करने लेई मंत्रालय नै 24 घंटे दा कंट्रोल रूम बी स्थापित कीता ऐ। प्रधानमंत्री नरेंद्र मोदी होरें नेपाल दे प्रधानमंत्री बलेंद्र शाह हुं'दे कन्नै फोन पर गल्लबात कीती ते भारत आसेआ हर मुमकिन मदद देने दा भरोसा दोआया।

<><><><><><>

Vande Bharat

केंद्री विज्ञान, तकनीक ते जमी विज्ञान राज्यमंत्री डा. जितेंद्र सिंह होरें अज्ज आखेआ ऐ जे जम्मू-श्रीनगर बश्कार त्री वंदे भारत रेल गड्डी तौले गै शुरू कीती जाहग ते इसी जम्मू-कश्मीर दे लोकें दे विकास आस्तै महत्वपूर्ण दस्सेआ। इक वीडियो स्लेय च सिंह होरें आखेआ जे रेलवे मंत्रालय नै उधमपुर च रेल गड्डी रोकने गी मंजूरी देई दित्ती ऐ। मंत्री होरें रियासी च चिनाव दरेया उप्पर दुनिया दा सबनें शा उच्चा पुल बनाने गी इंजीनियरिंग दी बड्डी उपलब्धि दस्सेआ। उनें प्रधानमंत्री नरेंद्र मोदी ते रेलवे मंत्री हुं'दा धन्नवाद बी कीता। जितेंद्र सिंह होरें आखेआ जे रेल जात्तरा पर्यटकें आस्तै आकर्षण दा केंद्र ऐ कीजे बड्डी तादाद च यात्रु जम्मू थमां श्रीनगर दे रेल गड्डी दे सफर दे दरान मनमोहक नजारें दा लुत्फ लेंदे ना।

<><><><><><>

Jammu e-Buses

जम्मू गी केंद्र दी पी.एम ई-बस सेवा स्कीम दे हेठ 25 होर इलेक्ट्रिक बसां थहोडन जेदे आस्तै जम्मू स्मार्ट सिटी लिमिटेड नै पी.एम.आई इलेक्ट्रो मोबिलिटी सल्यूशन्स प्राइवेट लिमिटेड कन्नै समझौते पर हस्ताक्षर कीते ना। समझौते पर जे.एस.सी.एल दे सीईओ देवांश यादव होरें रिहायशी ते शैहरी विकास विभाग आसेआ ते पी.एफ.आई इलेक्ट्रो मोबिलिटी सल्यूशन्स दे चंद्रकांत कुमा हुंदी मौजूदगी च हस्ताक्षर कीते। जे.एस.सी.एल पैहले गै शहर च 100 ई-बसां चला'रदा ऐ। अधिकारिएं दा आखना ऐ जे बाद्दू 25 बसां मिलने कन्नै जम्मू दे पब्लिक ट्रांसपोर्ट दा नेटवर्क मजबूत होग ते शैहरे च साफ ते टिकाऊ संपर्क दा बादा होग। नमीं बसां भगवती नगर डिपो थमां चलडन जिसी जे.एस.सी.एल नै तैयार कीता ऐ। पी.एम ई बस सेवा स्कीम दे हेठ 75 होर

बसें दा जम्मू आस्तै प्रस्ताव ऐ जेदे कन्नै 100 नमीं बसां पूरी होई जाडन। पैहले चला'रदियां 100 ई-बसें दे कन्नै नमीं बसां रली जाने कन्नै कुल 200 ई-बसां जम्मू च चलडन।

<><><><><><>

BRICS

भारत अगले म्हीने दी 12 ते 13 तरीक गी नमीं दिल्ली दे भारत मंडपम च 18में ब्रिक्स सम्मेलन दी मेजबानी करोग। इस सम्मेलन च ब्रिक्स मिम्बर ते सांझेदार देशें दे नेता इकट्ठे होडन। ब्रिक्स दी अध्यक्षता आस्तै विशेसार ऐ “Building for resilience, Innovation, Cooperation and Sustainability” यानि लचीलेपन, नमेंपन, सहयोग ते टिकाउपन आस्तै निर्माण। इस विशेसार च प्रधानमंत्री नरेंद्र मोदी हुं'दा लोक केंद्रित नजरिया झलकदा ऐ जेदा आधार ऐ इंसानियत सबनें शा पैहले। इस बारे भारत दी अध्यक्षता हेठ 350 बैठकां ते उच्च स्तरीय मलाटियां पूरे देश दे 25 शैहरें च होई चुकी दियां न, जेहदा मकसद ब्रिक्स रणनीतिक सांझेदारी गी मजबूत करना ऐ। भारत ब्रिक्स दा पहला मिम्बर ऐ ते पहले 2012, 2016 ते 2021 च एहदी अध्यक्षता करी चुके दा ऐ ते इस बारे पैहली जनवरी गी चौथी बारी अध्यक्षता दी जिम्मेदारी लैती ऐ। 2026 दा बरा महत्वपूर्ण ऐ कीजे इस बारे ब्रिक्स दी स्थापना दे 20 बरे पूरे होडन।

<><><><><><>

Neeraj Chopra

दो बारी ओलंपिक मेडल जेतू भारती खडारी नीरज चोपड़ा होरें 2026 डायमंड लीग फाइनल च थाह बनाई लैती ऐ जेड़ा जे अगले म्हीने ब्रसेल्स च होग। चोपड़ा हारें 12 अंक हासल कीते। 85.69 मीटर दूर नेजा सुट्टने कन्नै दोहा च जून म्हीने नीरज चोपड़ा नै चाँथा गेडत्र खत्म कीता हा। इस म्हीने लाउसेन मीटर च 88.05 मीटर दूर नेजा सुट्टने कन्नै उनें दुआ गेड खत्म कीता।

<><><><><><>